



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 841, Datë 27.10.2021

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË ENERGY PLUS SHPK NGA SHOQËRIA DUFERCO POBREG SHPK.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard YPI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 27.10.2021, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të shoqërisë Energy Plus SHPK nga shoqëria Duferco Pobreg SHPK.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të shoqërisë Energy Plus SHPK nga shoqëria Duferco Pobreg SHPK.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi mbi përfimin e kontrollit të shoqërisë Energy Plus SHPK nga shoqëria Duferco Pobreg SHPK.

Referuar dokumentit “Marrëveshje paraprake shitblerje”, të lidhur më datë 14 korrik 2021, palët janë:

Pala blerëse: *Duferco Pobreg SHPK*, është një shoqëri me përgjegjësi të kufizuar, me objekt aktiviteti: studimin, konsulencën, projektimin, prodhimin, realizimin, tregtimin e projekteve të investimit të centraleve, të linjave të transportit të energjisë elektrike, të impianteve në përgjithësi në sektorin e energjisë nga burime të rinovueshme në Itali dhe jashtë saj, menaxhimin e impianteve si në pikën më sipër, prodhimin e energjisë elektrike dhe tregtimin e saj, edhe nëpërmjet veprimtarisë së tregtimit, etj.

Shoqërinë *Duferco Pobreg SHPK*, zotërohet 100% nga shoqëria *Duferco Energia S.P.A.*, e cila është pjesë e grupit ndërkombëtar *Duferco*, aktive në sektorin e energjisë, në sektorët e çelikut dhe transportit detar.

Aktualisht shoqërinë *Duferco Pobreg SHPK* nuk ushtron asnjë aktivitet.

Pala shitëse:

1. *Agi Kons SHPK*, është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti: veprimtari në fushën e ndërtimit të përgjithshëm, veprimtari në fushën e projektimit, tregtim materialeve ndërtimi, import-eksport, etj.

2. *Energy Development Group SHA*, është një shoqëri aksionare, e themeluar sipas legjislacionit shqiptar, me objekt aktiviteti: studimi, projektimi, konsulenca sipërmarrja zbatuese dhe/ose investimi për realizimin me fonde publike dhe/ose jo publike të hidrocentraleve, financimi, vënia në punë, administrimi, prodhimi, shpërndarja, eksportimi dhe shitja e energjisë elektrike, ndërtimi i linjave të transmetimit të energjisë elektrike për tregtimin e saj, konsulencë teknike në fusha të ndryshme, supervizim, menaxhime dhe studime të të gjitha llojeve, etj.

Target: *Energy Plus SHPK*, është një shoqëri me përgjegjësi të kufizuar, me objekt aktiviteti: ndërtimin në lumin Luma në rrethin e Kukësit të hidrocentralit “Pobreg”, operimi dhe transferimi i hidrocentralit tek Autoriteti Kontraktues, duke përfshirë financimin, ndërtimin, vënien në punë, prodhimin, furnizimin, transmetimin, shpërndarjen, eksportimin dhe shitjen e energjisë elektrike të përfutur. *Energy Plus SHPK* është shoqëria koncesionare e themeluar për realizimin e kontratës së Koncesionit, e formës BOT, për ndërtimin e hidrocentralit POBREG mbi lumin Luma, rrethi i Kukësit

Shoqëritë *Duferco Pobreg SHPK*, *Duferco Energia S.P.A.*, *Agi Kons SHPK*, *Energy Development Group* dhe *Energy Plus SHPK*, kanë nënshkruar “Marrëveshje paraprake shitblerje” nëpërmjet të cilës shitësit kanë shprehur vullnetin e tyre për t’i shitur blerësit 100% të kapitalit themeltar që zotërojnë në shoqëri dhe rrjedhimisht, gjithë projektin, Hidrocentralin e Pobregut.

Shoqëria *Energy Plus SHPK*, aktualisht ka përfunduar me ndërtimin e hidrocentralit dhe është në fazën e prodhimit dhe tregtimit të energjisë elektrike.

Pas realizimit të transaksionit të propozuar shoqëria *Duferco Pobreg SHPK*, do të zotërojë plotësisht shoqërinë *Energy Plus SHPK*, e cila bëhet pjesë e Grupit *Duferco*.

Në zbatim të nenit 3 “ Kushti paraprak” të “Marrëveshjes paraprake të shitblerjes”, pala shitëse ka marrë miratimin nga Ministria e Infrastrukturës dhe Energjisë dhe ERE, për ndryshimin e kontrollit të shoqërisë Energy Plus SHPK.

Transaksion plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit mund të konsiderohet tregu për prodhimin e energjisë elektrike dhe tregu i shitjes me shumicë të energjisë elektrike. Treg përkatës gjeografik do të konsiderohet territori i Republikës së Shqipërisë.

Për vitin 2020 numri i centraleve prodhuese private, të cilat kanë prodhuar energji elektrike, është 216 dhe kapaciteti i instaluar i centraleve prodhuese private është 1,058 MW, ku kapaciteti i instaluar i centraleve të prodhuesve të pavarur është 436 MW, kurse 622 MW i përket centraleve të prodhuesve me përparësi të energjisë elektrike.

Shoqëria Energy Plus SHPK zotëron hidrocentralin Pobreg, i cili ka kapacitet të instaluar prodhimi 12.3MW dhe ka prodhuar 37,285MWh gjatë vitit 2020. Prodhimi i hidrocentralit Pobreg gjatë vitit 2020 zë 0.7 % të totalit të prodhimit vendas të energjisë elektrike.

Transaksioni i propozuar do të realizojë përfundimi i kontrollit të shoqërisë Energy Plus SHPK nga shoqëria Duferco Pobreg SHPK.

Duferco Pobreg SHPK është një shoqërie e sapokrijuar, e cila do të operojë në tregun e prodhimit të energjisë elektrike pas mbylljes së marrëveshjes dhe zotërimit të hidrocentralin Pobreg, duke përfituar edhe pjesën e tregut të zotëruar tashme nga shoqëria Energy Plus SHPK.

Për shkak të pjesës së vogël që zotëron Energy Plus SHPK në tregun e prodhimit të energjisë elektrike dhe faktit që Duferco Pobreg SHPK nuk ka operuar në këtë treg, transaksioni i synuar nuk do të sjellë ndryshime në tregun përkatës dhe nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfundimit të kontrollit të shoqërisë Energy Plus SHPK nga shoqëria Duferco Pobreg SHPK.

2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS